

北 京 古 籍 叢 書

日 下 舊 聞 考

(四)

〔清〕于敏中 等編纂



北京古籍叢書

〔清〕于敏中 等編纂

日下舊聞考
(四)

北京古籍出版社

欽定日下舊聞考卷一百二十一

京畿

保定縣

原保定縣在州城南四十里。

明一統志

〔臣等謹按〕保定縣明屬霸州，本朝屬順天府。

增縣在府南二百里，東西距三十三里，南北距二十八里。東至文安縣界二十二里，西至保定府雄縣界十一里，南至文安縣界二十三里，北至霸州界五里，東南至文安縣治四十里，西南至河間府任邱縣治九十里，東北至永清縣治七十里，西北至保定府新城縣治九十里。

大清一統志

〔臣等謹按〕保定縣所轄幅員本不甚廣，是以統屬未嘗有定。秦屬上谷，漢屬渤海，

東漢又屬廣陽，晉屬章武國，隋初屬瀛州，後復屬涿郡。保定爲涿之新鎮地，唐爲幽州，五代石晉割以賂遼，屬析津。後周顯德六年，世宗置霸郡，而邑屬霸。宋置平戎軍，改保定縣，金元明仍之。蓋其地實爲瀛莫要區，設邑建官，固不在疆域之

廣狹也。

原保定本雄州歸信縣之新鎮也，其形勝乃邊陣之衝要。

九域志

原太平興國六年，以涿州歸信縣新鎮置平戎軍，景德元年改爲保定軍。

輿地廣記

增平戎軍今保定縣治。樂史、太平寰宇記，本莫州新鎮之地。太平興國六年，陞爲平戎軍，以扼邊陲之喉。東至霸州三十里，西至莫州七十里。

大清一統志

〔臣等謹按〕大清一統志，保定漢涿郡易縣地，唐爲涿州歸義縣地。宋初爲歸信縣地，太平興國六年，置平戎軍。景德元年，改爲保定軍。蓋是時以澶淵之役，遼遣韓杞來請周世宗所取關南地，不許，始改保定之名也。

增平戎軍本雄州歸信縣之地，景德元年改爲保定軍。景祐元年，析霸州文安、大城二縣五百戶隸軍。

九域志

原宣和七年，廢保定軍爲保定縣，隸莫州，尋依舊。

宋史

〔臣等謹按〕保定入金，卽宋徽宗宣和七年事也。是時其地已屬金之雄州。據宋史地理志所云，尋依舊者，蓋具文耳，實非宋有也。

原保定縣，從軍名也。

郡縣釋名

原金爲保定縣，屬雄州。元割屬霸州，至元二年省入益津縣，四年復置。

清類天文分野之書

原保定故城相傳宋團練使楊延朗所築。嘉靖庚戌，羽書告急，郊圻震驚。知縣事崇德呂煥首出俸錢以爲倡，乃度地量工，斟酌舊址，棄東南而依西北，以便守也。僅五月而告成，煥自爲之記。

保定縣志

呂煥修城記
城池之設，所以保障一方，爲百年計也。近時值多事，予奉檄築建，蓋守土之急務，不容緩者。但公帑空虛而力有未逮，每懷耿鬱。邑人聞之，咸相謂曰：此舉爲誰而使？侯若是也？遂欣然各自以家私之盈縮，議但備物料，以助城工。卽疏名以聞於予，不越月而諸料畢集矣。且當道之省諭有曰：成大事勿惜財費。予亦曰：不一勞不永逸。而諸尚義者之樂事赴工，適與符合。是則所賴以共成斯舉，以垂千百年屏翰之業者，非斯人而誰與？用布姓名，俾勒於石。若其賢士大夫贊予議以決其成，且捐資爲一邑倡，必有能記之者。茲不敢槩書。嗚呼！建立惟艱，尚冀後之同志君子永圖之。

保定縣志

〔臣等謹按〕保定縣舊城計周六里奇六十九步，高三丈，闊二丈，導玉帶河以環其外。今舊址尚存。新城計周八百八十九步，高一丈五尺，卽呂煥所謂棄東南而依西北以便守者。新城凡四門：東曰通和，南曰南薰，西曰惠安，北曰玉流。環聚其上，皆有敵樓。謹附載以備考。

原縣治及學宮皆洪武中知縣事張仲謹建。

保定縣志

增燕平書院在保定縣北門內。本朝乾隆二十三年，知州芮泰元建。

大清一統志

增玉河書院在保定縣北門內。本朝乾隆二十一年知縣孫似梅倡建。

同上

原保定軍砦二：桃花軍北七里；父母軍北一十一里。

九域志

增桃花砦，世傳楊延朗築屯軍士，基址尚存，今稱旋馬結達。

保定縣志

原政和三年，改父母砦曰安寧。

宋史

增將臺在縣西南，楊延朗演武之處。下多鐵汁，掘土者每見殘戟。

保定縣志

〔臣等謹按〕保定在宋時最爲重地，是以楊延朗守此以鎮三關。北以霸州爲一關，西

以雄州爲一關，又白溝河爲一關。其團練兵馬處遺址尚存云。

增父母軍寨在城西八里，楊延朗守平戎時，感父業殉敵，祭父於此，今稱爲寨上。

保定縣志

增六郎洞在東關，古傳通數十里，今失其處。

同上

增張青口，衆流中一凸，千艘來集，爲保定、正定、河間三府行鹽要地，商賈貿易，水

路通衢。

同上

增南鎮在城南十八里。

同上

〔臣等謹按〕保定縣志，南鎮爲南北往來孔道，河流環繞，岸有古柏橫接如橋，行者便之，邑志謂之柏橋古渡。

原玉帶河在縣北，繞縣東南入於磁河。或曰卽霸水之下流也。

方輿紀要

原磁河源自安州，聚九河之水，至雄縣爲瓦濟河，至保定縣爲磁河，入直沽。

明一統志

增玉帶河上流有二派：一西北自新城縣來者曰北九河；一西南自任邱五官淀來者曰南六河。俱會於雄縣之毛兒灣，流入保定縣界爲玉帶河。

大清一統志

〔臣等謹按〕縣治西北九河：一盧溝，一拒馬，一夾河，一琉璃，一胡良，一桑乾，一烏流，一白澗，一白溝。西南六河：一黑羊河，一一畝泉，一方順，一塘河，一沙河，一磁河。俱匯於保定。玉帶河亦名苑口河，是河容納衆派，全資千里堤岸以爲保障。且保定在河之南，文安又在保定之南，大城又在文安之南。保定之堤永固，則三縣皆受其福矣。

陸光旭修堤碑記 玉帶一河，爲白溝、滹沱、琉璃數十河之下渚，恃長堤百里以爲之防。鯨波一決，三邑其魚。官斯地者，生斯地者，固與堤爲命者也。夫以衆河之水聚一河則易決，以三邑之功禦一堤則易完。而歷來數失其防者，何哉？一以民習之久玩也，曲突不事，而補亡羊。一以隣人之秦越視也。同舟勿心，剥牀奚及？大霸州文大，幅員亘百餘里而遙，而堤則錯壤相間，或一邑分汛數處，或一堤數邑協修，自蘇橋迤東，文防居多，西則霸文相界，而盧各莊河干乃保疆分汛。十王堂者文堤也，接胡家墳保障者大城久不修之界岸也，靳家背後則保大所共有事也，何家道口則初爲大堤而今爲文堤也，過此南北橫堤則燕子口達北村武各莊者隸平戎，向南則廣陵修汎注窩則平舒分工也。段落甚悉，形勢昭然。三邑父老之胸中口中亦極了了。舊碑有曰文安五分，大城三分，保邑一分。蓋古人計害均勞，使犬牙相制者指臂牽連以使，此修彼應，良深意哉！旭以壬辰萸月筮宰平戎。越歲夏，適吳妖爲祟，靳家背後城堤危如累卵，牒呼不應，代荷鋤畚，豈天譴難回，狂龍夜潰，產蛙廬竈，稻蟹無遺，嗟此哀鴻，葬魚腹而徙四方，不知其幾千百人也！乙未暮春，詔發帑金修築，同廣陵宰韓子斗山、廣文張子大章暨捕幕謝廷祐，拮据於斷堤流水之間。夏徂秋，凡四閱月而堤成。又張臬使委代築大城注窩等堤數百丈。是年也，幸馮夷息浪，新壘屹然，去國仇讐，牽車而還故里矣。不意今夏之日，陽侯再肆，湧浪如雷，旭也，臨河而懼，疾呼鳩衆，駕土牛，操槍桿，五晝夜與蛟龍戰，而卒以堤全。廬舍幸免蜃魚之藻，居人始有稻梁之謀。於是紳士民僉欣然曰：是堤也，築於令，修於令，令之心骨竭於堤，堤之利害悉於令。盍鐫數語以爲後日券？因聊叙頗末於貞珉焉。凡百君子慎之哉！居安而虞，逝波其渝。臨深而惕，城維衆志。毋曰一簣，九仞功虧。毋曰涓涓，江河因之。詩不云乎，迨天之未陰雨，徹彼桑土。凡百君子慎之哉！毋忘鑿鼓！順治丙申立石。保定縣志

增 王各莊引河自玉帶河起至中亭河止，橫亘三千一百餘丈。乾隆十年開挖，二十九年疏濬。
（大清一統志）

〔臣等謹按〕大清一統志，王各莊引河舊名十望河，爲玉帶河分流。其源自西北來者，由雄縣入保定境，自西南來者由任邱縣入保定境，總匯於毛兒灣，至盧各莊下入霸州之中亭河。乾隆十年開挖二百四十丈，二十九年疏濬，至三十八年復展寬挖淤，詳見御製詩注中。

乾隆三十八年御製閱鷹嘴壩及鹿疃引河處詩以示直隸總督周元理 前歲決口凡兩處，東則鹿疃西鷹嘴。堵築長堤已完善，或再逢漲慮後此。況均臨近受頂衝，取直引河固其理。插標備覽取進止，就我所知無不指。鹿疃渠長已合宜，鷹嘴渠短應西徙。鹿疃引河，周元理擬挑九百丈，足資取直之益，即如所擬行。其鷹嘴壩曲處，止擬挑引河一百二十七丈，勢促而渠短，河猶頂衝，不能引溜以化險工。因指令徒西展長百十丈，使不逼近大堤。河防原以衛民，卽多費亦弗靳也。籌民惜費我弗爲，督吏鳩工爾其豐。

〔臣等謹按〕鷹嘴壩鹿疃引河御製詩，謹繹有關紀述者，恭載卷內。

保定
縣志

〔臣等謹按〕二里城今有遺址。

原保定堤自路疃村起，直抵西營唐頭等村，計長四十里，其南與文安界，而北則霸州也。議者謂決霸州之堤以疏水性，而築大堤於南以衛文安，則畿南十數州可免於水患矣。名勝

志

增保定堤卽千里長堤，明永樂六年知縣王孟原所築，舊爲秋水冲決，乾隆三十七修築。

保定
縣志

增黃猶岡在路疃東北隅。登眺其上，野花香滿，禾穗鱗層，清流環繞，綠樹陰濃。上同

〔臣等謹按〕路疃卽鹿疃，其東北隅尚存小土阜，土人傳焉黃猶岡。

原漢張堪墓在城西南二里。保定

縣志

〔臣等謹按〕後漢書，張堪拜漁陽太守，開稻田八千餘頃，致民殷富。百姓歌之曰：桑無附枝，麥秀兩岐。張君爲政，樂不可支。視事八年，其葬處史無明文，非如朱邑桐鄉之鑿有可據。惟考保定於漢爲涿郡易縣地，與漁陽郡統屬幽州，其界相連，或亦堪遺愛所在。然其蹟已不可復辨矣。

原唐竇建德墓在城西南二十里。保定

縣志

〔朱彞尊原按〕新、舊唐書，建德於陣前俘獲，戮於長安市。保定有墓，未必真也。

增天寧寺在城東北隅。保定

縣志

〔臣等謹按〕天寧寺未詳始建年月，有弘治元年僧隱庵撰重建碑記，爲邑之鉅刹。有古鐘，聲振十餘里。今鐘樓雖廢，而鐘尚存。

明僧隱庵天寧寺重建碑畧保定縣城東北隅有吉壤爽塏，昔人卽其地建精藍，榜曰天寧，實折內之鉅刹也。經始未遑究其年代。元季寺毀，迨宣德改元，洞明禪師甫棲之，覩茲廢跡，遂奮志興復。先於西山伐杞梓楩楠，塞川而

下，甄陶甓瓴，堆邱積岳。於是漸次縮搆，邑民施捨者旁午絡繹。其制先建殿庭，至若丈室神祠祖堂，繚垣屹立，回廊四合。厥志未就，付屬弟子遠悟。遠悟能不負所屬，以興修爲己任。前建天王殿，并禪堂齋廡洎山門，凡叢林所宜有者，以次修畢。遂能化瓦礫爲祇園，幻荆棘爲金刹。猗歟盛哉！余嘗謂格理盡性，爲人道之本，僧園法物，乃宏道之資。欲樹其本，必賴其資。今茲營建，使樹其本者有所資，宏其道者有所託，其於佛門可謂大有功矣。遠悟不遠千里，謁予爲文，茂揚成績，詞不逮意，直言其梗概，勒諸貞珉，庸示悠久云。弘治元年歲在戊申四月日立。保定縣志

欽定日下舊聞考卷一百二十二

京畿

文安縣

原文安縣在州城南七十里。

明一
統志

〔臣等謹按〕文安，元明皆屬霸州，本朝改隸順天府。

增文安縣在府南二百四十里，東西距五十八里，南北距七十里。東至大城縣界四十里，西至保定縣界十八里，南至河間府任邱縣界三十里，北至霸州界四十里，東南至大城縣治五十里，西南至任邱縣治七十里，東北至東安縣治一百二十里，西北至保定縣治四十里。
大清一
統志

原文安漢縣，屬渤海郡，東漢屬河間國，和帝二年置瀛州，以縣屬焉。

清類天文
分野之書

原晉泰始元年，分瀛州之東平舒、文安、章武、東州置章武國，縣在古文安城。至後魏太平十一年，置瀛州以統章武縣，遂歸瀛州。北齊廢章武，入文安。隋大業七年，征遼，途經於河口。當三河合流之處，割文安、平館、三邑戶於河口置豐利縣。隋末亂離，百

姓南移。唐貞觀二年，以豐利、文安二縣相逼，遂廢文安城，移文安民就豐利城，置文安縣，即今理也。太平寰宇記

原唐初屬瀛州，景雲二年屬莫州，周顯德六年屬霸州。

九域志

原宋景祐元年，省永清入文安，移州治於此。皇祐元年，復徙治故地。

清類天文分野之書

原金大定中徙州治益津，以縣屬焉。

方輿紀要

原元屬霸州，明因之。

清類天文分野之書

原漢縣令趙夔創建土城，明正德九年知縣事王鼎重修，翰林院侍讀李時撰記。

文安縣志

李時修城記正德辛未，河北盜起，剽掠諸州縣，文安荼毒最甚，坐城之廢故也。歲癸酉，齊東王君來尹是邑，顧而嘆曰：「民保於城，城關於令，城之廢，民不能生矣。」乃集耆老諭之，并力交作。興役於甲戌三月，閏明年乙亥秋訖工焉。城周圍九里，列雉堞，建樓櫓，題其門南曰來薰，北曰拱辰，東曰迎恩，西曰永定。由是文安之民欣欣焉賴以無恐。君名鼎，字公實。相是役者，縣丞王景沂也。

薇花堂稟

〔臣等謹按〕縣志，明正德間知縣王鼎修城。計袤七里，高二丈五尺，城門五，角樓四，敵臺警舖八，濠池沿城周圍一千二百七十丈，外護以堤。崇禎中，知縣張上春增高五尺，添砌甃堞甕城。本朝乾隆三十三年，知縣阮基領帑加磚砌城，添設門樓，修橋濬池。

原縣治，元皇慶元年，知縣事李祐修建。明洪武初，縣丞鄧士龍重修。儒學創自宋大觀八年，元皇慶中知縣楊潤李祐重建。泮池東北壁有大觀碑，宋徽宗手蹟也。

文安縣志

〔臣等謹按〕宋徽宗碑今字蹟漫滅。

尚野重修文廟記 文安廟學，貞祐甲戌，金主南渡，焚蕩殆盡，僅存大觀八行之碑。再歷周宋，遼金祚終，皇元受命，肇開貢舉，優復中選，草昧漸革。世祖潛藩，賓禮師儒，務先學校。至元三年，勅上都建孔子廟，用敦化源。四方萬里，莫不知所振厲，黽勉從事。文安近在畿內，無以興德意。二仲釋奠，卽其故基，表以草幕，苟簡不恭，觀者惻然。八年辛未，縣設教諭，以邑儒董君榮爲之。董君素有興復議，而病未能也。卽言於縣，以國家方事襄樊，爲平宋張本，不獲所請。庚辰，以屋貲錢合若干緡，伐木湯川，往返千里，三歷寒暑，衆材始聚。瓦甓釘礎，黝堊丹漆，各輸所有，以後爲恥。卜日其吉，工力並作，不期月，禮殿四楹鼎鼎，宏敞靚深。先聖先師十哲，像設顯嚴。章施可徵，如一大府。惟從祀之室，大成之門，經畫井井，未克備舉，所謂再易之地，力盡而休。今復七歲矣。其在官者，主簿姚元、縣尉張瑛、縣尹楊潤、今縣尹李侯祐相繼而輔成之。二十八年，兩廡翼翼，繪像七十二子。明年，大門言言清靜。董君既沒，子道清堂正、孫楨教諭承其事，如君存焉。大德辛丑，後以講堂，前以櫺星。至四年，以雀育廡瓦，易版以牖。初，講堂有闕，至是戶牖端朗，階址堅整，燦然一新。李侯俾來謂予曰：文安廟學之廢，荆棘瓦礫者六十年。董君父子祖孫，勤苦四十餘年，卒成盛事，請文勒諸石，永資名教。野既允祐之請，且以廟學之本，告之曰：古者民以君爲師。書曰：若有恒性，克綏厥猷，惟后。孔子雖無其位，而綏猷修道之統不忍絕也。刪定贊修之後，理寓於六經。六經卽天，天卽聖人，故自天子以至庶人無一不可以學孔子。必反身思誠，存心養性，得夫廟之制，而不失其學之實，非徒王安石所謂近世法者也。邑令與董君父子祖孫之成廟，亦豈韓愈所謂不能修事者哉？雖然，學必久而後成，野喜其民牧學官之克協而將行，又慮其始勤終怠而不繼也，因并附此以示無窮焉。文安縣志

增後漢書：度尚由上虞長遷文安令。註曰：文安縣故城在今瀛州文安縣東北。同

原舊文安城，寰宇記在縣東北三十里。今柳河有古城正當艮隅，卽文安故城無疑矣。上有漢縣令趙夔祠。同

增柳河鎮有渠。
統志

原文安，潭名，潭在縣北一十五里。

郡縣
釋名

〔臣等謹按〕縣志，文安潭卽急流口。

原文安有狐狸淀。

隋書

原文安縣狐狸淀，俗謂之掘鯉淀。

隋圖經

〔朱彞尊原按〕掘鯉之淀，見左思魏都賦。

增石城淀在文安東北四十八里，又有慈老淀、黑母淀、落坡淀、四角淀，俱在縣東北，又趙家泊，在東北六十里，卽太平寰宇記所謂滹沱河東溢爲趙淀也。大清一統志

原水紋淀在縣西。宋起塘濼東自信安軍永濟渠，西至霸州莫金口，合水紋、得勝諸淀爲一水，今廢。方輿紀要

原火燒淀在縣東二十五里，廣四十餘畝。縣境有石溝、柳河、急河三水，皆聚流於此，東入衛河，達於直沽。元志：河間府境有黃龍淀，自鎖井口開鑿至文安縣玳瑁口通濼水，經火燒淀轉流入海。今湮廢。上同

原易水在縣西，自保定轉流入境，卽沙河諸水下流也。上同

增縣西北遙堤自白家道口至上五各莊，長八里。明萬曆間築。大清一統志

〔臣等謹按〕縣志，白家口又名河家口。

原滹沱河水在縣西北三十里，又東溢爲趙淀。

太平寰宇記

原今川原改易，滹沱經縣東南，不經縣西矣。

方輿紀要

〔臣等謹按〕滹沱之環文安者三支：北支由河塘下白洋淀；中支由晉州天宮口至河間下五官淀；南支，卽子牙河也。又最南一支，由深州衡水清河單家橋下青縣入御河。後諸支俱淤，惟子牙河一支會諸流匯三角淀。今益改而東，下流逕會清河達西沽矣。

原霸州苦水，而文安形如釜底，尤爲諸水所滙。其苑家口會同河與栲栳圈新挑河各東西相去約二十里。北岸屬霸州，南岸屬文安，各築高堤，文安約六七十里，霸州約五六十里，屹如長城。累年有秋，實賴於此。但築堤愈高，壅水愈甚。故議者謂京師之南水害以霸州文安爲之阻也。長安
客話

壩子牙河自河間流入，分二支：一西北流入文安縣石城淀；一北流又分三支：西支入文安縣黑母淀，東支入大小窩口，中支入霸州文爾淀，總匯於三角淀，入白河。大清一統志

〔臣等謹按〕通志，子牙河總會南北二泊澮澮諸水，而滹沱實爲經流。其性湍悍，伏秋水發，河間以北，靜海以南，皆當其衝。康熙三十九年聖祖新閲河工，特授方畧，於獻縣河間東西兩岸築長堤，西接大城，東接靜海，各二百餘里。又於東堤廣福樓之焦家口開新河一道，東北至賈口入淀。特設分司一員董其事，自是瀕河之民咸獲寧宇矣。

〔又按〕康熙四十年，聖祖巡視子牙河壩，以御臨唐太宗所書漢文帝勸農詔賜撫臣李光地。同知臣楊朝麟勒石。

增聖祖仁皇帝御製巡子牙河建壩詩、暫別宮槐幸子牙，近村處處少人家。清河微暑浮畦麥，綠樹初陰接岸沙。堤外草荒艱籽粒，淀中水淺捕魚鰐。黃童白叟望霖雨，霖雨先施莫自賒。

增乾隆三十二年御製恭依皇祖閱子牙河詩韻有序子牙河，滹沱下游也，逕大城縣之子牙村，始得是名。夫滹沱在昔卽已著稱，而子牙之名則非古。乃縣志謂其地有子牙廟，卽釣臺遺址，所言無足據。按史記載，呂尚以魚釣于周西伯，西伯獵遇於渭之陽。注引酈道元、劉向之說以證。雖磻溪、渭渚，釣迹不同，而其地尚皆近岐西。故文王出獵得遇之，自爲可信。至此地距岐數千里，安得有釣璜遇主事？蓋古蹟流傳，率多假借，不特釣臺說涉荒唐，卽以大城爲東海之濱亦非確鑿不移者。紀載家傳會失實者多矣。子牙村之釣臺何獨不然？既閱河成詩，并爲序而正之。滹沱至此號姜牙，傳會從來紀載家。北界地高南界下，八分水帶二分沙。籌防沃土資堪黍，庶免村人歎作鰐。碑仰行間將字裏，愛民肫意緬懷賒。

增乾隆三十五年御製再依皇祖閱子牙河詩韻

謾議滹沱訛子牙，

滹沱河以經大城縣之子牙村，遂有子牙河之名。舊志因傳會

其地有釣臺遺蹟。丁亥春，巡閱河堤，曾依皇祖詩韻，並於詩序辨呂尚釣璜不應在此，一家秦趙詎殊家？麥以訂其訛。雖然，天下一家，奚分秦趙？總在大地之內，此一轉語亦不可少也。

因淀潤纔出土，柳偃堤風欲捲沙。籌畫當年仰疏瀘，閭閻今日利魚鰐。觀民要爲去安民計，咫尺穹碑法豈賒？

增乾隆三十八年御製三依皇祖閱子牙河詩韻 東溜沿河有鋸牙，經村因遂屬姜家。子牙河本紀要滹沱下游，以經大城縣之子牙村，始得是名。向曾於和韻詩序訂正其誤，繼復爲轉語解之。然河因人得名，且其說無稽，究不足爲正也。人清本是東歸海，隔運都緣西挾沙。堤外資耕黍與稻，水中任取蟹和鯷。屢巡總爲蒼生計，繩繼無違企蹟賒。

〔臣等謹按〕子牙河御製詩，謹繹有關紀述者恭載卷內，餘不備錄。

原蘇家橋在縣東二十里，當往來之孔道。靖難初，燕王自固安縣渡巨馬河，駐師蘇家橋，即此。方輿紀要

〔朱彝尊原按〕蘇橋，縣志謂蘇明允故蹟，載詩云：蘇公曾授文安簿，河上蘇橋自昔傳。然明允爲文安主簿，以修禮書授秩，未嘗赴州也。

〔臣等謹按〕文安堤在霸州苑家口，經蘇橋堂頭村至土橋村，長九千餘丈。乾隆二十六年，河水漫溢，築護月堤草壩。三十二年，自三灘里西接千里長堤，築格淀約二千餘丈，新舊堤岸各長一萬一千餘丈。

增蘇家橋恭建行宮。文安縣冊